

Scioldi tla Cësa de Paussa, la minonghes

Do che Martina Goller ova dit la sia dan doi enes n con' de scioldi a desposizion dla Lia Cësa de Paussa, ntëur a 1.200.000 euro, ova Walter Kasslatte dit la sia l'ena passada. Sën la contra-resposta de Martina Goller y la posizion dl ambolt de Urtijëi Ewald Moroder

Cësa de Paussa - Martina Goller ova fat referimënt a nformazions dates da Walter Kasslatte. Kasslatte nstës ova pona ulù stlari si pont de ududa, critican nce Goller per avèi tët ca la cuestion per propaganda partitica dan la veles.

Martina Goller à chëst'ena mandà ite na si segonda tëtta de posizion, nce coche risposta ala critiches de Kasslatte.

La minonga de Martina Goller

Goller scumëncia si comunicat dijan che "l ambolt de Urtijëi se damanda de reviers 149.079,87 euro dala Lia Cësa de Paussa. L ie drët che i zitadins sebe che dai 22.01.2003 inant fova i ambolc cumëmbri dla Lia Cësa de Paussa coche persona privata. Ai 22.10.2010 à l Cunsëi de Urtijëi deliberà cun duc a una de diventé cumëmbri dla Lia Cësa de Paussa de Gherdëina. L ambolt fova nsci cumëmbri te si ncëria istituzionela. Davia che l fova ntëuta de gran descusions pervia dla forma de gestion, fans d'instà dl 2012 jic a se damandé nformazions, sibe dal ambolt de Chemun de Ciastel che dal ambolt de Urtijëi. Per gauja di defizic dla Lia, che mëssova uni curii dai Chemuns, la tarifes tan autes y ajache la gestion tres na lia mëssova uni scritta ora, fans nëus a una de ti sëurandé la gestion ala Cumenanza raionela Salten Scilier. Fan tl 2013 nce unic a cunescënza de problems che ova da n fé cun l personal. Tla senteda di 11.10.2013 à l Cunsëi de Chemun dat pro cun duc a una de ti sëurandé la direzion dla Cësa de Paussa y dl Zënter de Cura S. Durich ala Cumenanza raionela Salten-Scilier, cun fazon dai 1. de jené 2015 nchin che la unissa trata de reviers. Pervia dla

tarifes per l 2014 ova l ambolt coche reprejentant istituzionel dl Chemun de Urtijëi duta la nformazions dla bona bilanzes y l dërt de stima tla Cësa de Paussa. Cun lëtra di 06.11.2014 se damanda l ambolt de reviers i cuntribuc dac ala Lia Cësa de Paussa di 14.06.2004, di 04.11.2008, di 10.12.2010 y di 06.10.2011. Na soma duta adum de 149.079,87 euro. Chësc ne n'ie no uni purtà dant tl Cunsëi de Chemun de Urtijëi y l ne n'ie nce deguna delibera de Jonta. Ai 06.03.2015 à i Freihetlichen dat ju na nterugazion ala Jonta provinziela per avèi stlirimënc n con' dla situazion dla Cësa. Che de merz de chëst ann à la Lia Cësa de Paussa 1,2 milions de euro de avanz sun l cont de banca y che l fova mo d'otra somes de scioldi "in contanti", sons permò unic sëura do che son jic a rujené cun l cumerzialista y presidënt dla Cësa Walter Kasslatte, dal ambolt ne ons mei giapà chësta nformazions, no te Cunsëi de Chemun y no te d'otra ancutedes. Dije chësc nce sce pona unirei atacheda persunalment. Bonament èi tuca n pom scialdi dlicat, cun nformazions che ne ëssa nia dassù uni a lum. No l ambolt cun si maniera de fé, da mé ora puech profesciunela, y ënghenó l cumerzialista Kasslatte cun n articul do mi ntënder plutosc emuzionel, ne me tol la cunvinzion che ti ultimi diesc ani te Cunsëi de Chemun èi cialà de fé n bon lëur." Nscila scrij Martina Goller.

La minonga de Ewald Moroder

Bele l'ena passada ova l ambolt Ewald Moroder tëtut posizion diretamentèr te redazion dla USC, ulache l ova purtà la copia dla

delibera de Cunsëi de Chemun de Urtijëi di 11.10.2013, ulache la jiva de sëurandé la gestion dla Cësa de Paussa S. Durich de Urtijëi ala Cumenanza raionela Salten Scilier, ulache l fova tan che duc a una, cun mé una na astenscion, "ma deguni de contra," coche auza ora Moroder, che mostra nce su che la Repartizion di Enc Locai dla Provinzia de Bulsan ova scrit, cun lëtra 26.10.2010 mandeda al ambolt de Ciastel Andreas Colli, che na lia privata ne possa nia mené na strutura coche la Cësa de Paussa y che l manejamënt y la direzion muessa uni scric ora publicamentèr.

Moroder: "Dan trëi ani ons purv a scri ora l servisc publicamentèr. Unit adalrech iel dites da duta la Talia; ma da chëstes ulans se stravardé. Chësc sà duc i conselieres dl Chemun de Urtijëi, dije mo n iede duc!, y avisa! Defati iel pona ai 11.10.2013 uni fat na delibera per ti sëurandé ala Cumenanza Salten Scilier la gestion dla Cësa, mutivan l var dijan che pra la Cësa de Paussa se trätel de na istituzion y de n servisc public. L fova la sëula puscibiltà per fé che la gestion ne fossa nia jita oradecà, che l ne fossa nia unit adalrech zachei da demez, da duta la Talia."

Nscila Moroder, che ne uel nia lascé valèi de ne avèi nia dat nformazions: "È dit la cosses plu iedesc te Cunsëi de Chemun. Sambën che duc assans abù gën y assan for mo gën che la lia privata jissa inant, ma la ne jiva nia autramentèr."

N con' dla soma de 1,2 milions de euro a desposizion dij Ewald Moroder: "Walter Kasslatte ie stat presidënt dla Lia Cësa de Paussa nchin ai 31.12.2014, lauran te na maniera trasparënta. Per fortuna ti iel restà scioldi ala Lia, miec nscila



La Cësa de Paussa a Urtijëi.

che no sce l fossa restà n gran busc. La Lia cësa de Paussa ie de ulentariat y laurerà inant deberieda cun i Chemuns de chësc viers. Mi gran stima ti va a dut l cunsëi dla Lia Cësa de Paussa che à veramentèr laurà bën per nosta jënt de tëmpe."

Ala dumanda sce l ie pa segur che i scioldi ti vede inò de reviers ai Chemuns, ie pu i scioldi unii dac coche cuntribut "a fondo perduto", chël ulëssa pudèi di che n teoria pudëssa la Lia fé cieche la uel cun i scioldi, zënza damandé la man publica, respund Moroder che "i scioldi unirà dessegur dac ora per l soziel de nosta valeda. La Lia Cësa de Paussa à n statut bëndebot tler, ulache l ie nce laite i reprejentanc di Chemuns, y perchël ie chësc dessegur na bona, ma nce na garanzia che i scioldi vede a fin de bën per l servisc y per la strutures dl soziel y mé dl soziel de nosc raion!" Nscila Moroder, che dij, cun referimënt a Martina Goller, "sce cun na cossa fata tan bën muessen fé campania litela, pona iela bën trista!"

Moroder stlarësc mo n valgun details tecnicos, de viers dla reflexcion n con' dla regulamentazion dl titul de purtenienza ala grupa de rujeneda ladina per l personal: "Sën coche sën iel l proporz di cater Chemuns, de Gherdëina cun Ciastel." Dumanda: "Chël uel dl che cun Ciastel ie la pert proporzionela di ladins mëndra?" Moroder: "De

chësc viers laurons mo per na miëura soluzion. Ma muesse bën auzé ora che son stac boni de arjonjer che truepa jënt da tlo à giapà na stiera de lëur, y tl dauni jirà nosc mpëni inant de chësc viers. Ulon y messon garanti l servisc cun cunlauradëures cualifiche, che l ne n'ie da ncuei a duman mo nia stat mesun abiné duc ma mé na gran pert. Ma mo n iede, on fat n gran var inant, ntant iel na gran pert di cunlauradëures che sà la trëi rujenedes ladin, talian y tudësch, n valgun puec almanco y per ntant la doi rujenedes, tudësch y talian." Nscila l ambolt Moroder.

Tlo la minonga di doi espunënc de Urtijëi. La cuestion ne à nia mé da n fé cun l Chemun de Urtijëi, tuche i sambën nce i amministradëures di altri Chemuns de Gherdëina y de Ciastel. Pona réstel mo for la reflexcion, da "rumors" che vën ora da chiche sà nëut y che ie laite tla problematica ma che ne n'ie pra vel' partit, che n ëssa mpo mo pudè fé n majer sforz da pert de dui cater i Chemuns, acioche la Cësa fossa resteda tla mans dla Lia privata. Aldò di arac ufizie i unic ite nchinamò a nivel provinziel ne n'ie chësc nia mesun. Ma l se trata, coche dij la parola, de arac, sambën de na cërta valuta.

Dessegur arons mo l'ucajion de scric mo zeche, bonamentèr do la veles.

David Lardschneider